

四庫全書

子部

欽定四庫全書

子部

山堂肆考卷

三十二

詳校官中書臣孫 溶

主事臣祁韻士履勘

總校官降調編修臣倉聖脉

校對官主事臣陳 墉

謄錄監生臣吳裕崑

欽定四庫全書

山堂肆考卷三十

明 彭大翼 撰

地理

關隘

鄭玄注關境上門也月令孟夏關市無索順敷教不難物也周禮司關國凶札則無關門之征

廢六

左文二年臧文仲不仁者三不知者三下展禽廢六關

妾織蒲三不仁也作虛器縱逆祀祀爰居三不知也

據兩

漢武帝時霍去病擊破匈奴左右地分置武威等四郡
據兩關

燕三

燕有三關曰松亭曰古北曰居庸而平州之東有榆關
寶金人入寇之路凡此數關可以限蕃漢也而一夫守
之可以當百秦亦有三關大散關仙人關箭筈關是也

漢四

漢洛陽有四關東成臯關南伊闕關西函谷關北孟津關

越王置

蒲葵關在漳州府龍溪縣西南二十一都漢時南越王置

武帝移

函谷關有二一在河南靈寶縣南一十里老子西度田

文東出皆此關左右有望氣雞鳴二臺遺址此舊關也
一在河南新安縣東二里項羽坑秦卒處漢樓船將軍
楊僕征南越有大功耻為關外人上書乞以家財東徙
關武帝為移于新安縣此新關也

孟嘗夜出

史記秦昭王囚孟嘗君孟嘗君遂變姓名夜半至函谷
關關法雞鳴出客孟嘗君恐追至客有居下座者能為
雞鳴衆雞皆鳴遂得出又燕太子丹為質于秦秦王不

禮丹怒亡歸夜至關關門未開丹為雞鳴衆雞皆鳴遂得逃去

狄青夜度

宋狄青字漢臣汾州西河人夜度崑崙關大敗廣源蠻儂知高于邕州按邕州今廣西南寧府府城東九十里有崑崙山極險要古設關于此

乘白馬出關

桓譚新論公孫龍常爭論曰白馬非白人不能屈後乘

白馬無符傳欲出關關吏不聽此虛言難于奪實也故
劉向七略公孫龍持白馬之論以度關即此唐太宗入
潼關詩高談先馬白偽曉預雞鳴

乘青牛度關

關令內傳尹喜字公度號文始先生周元極元年某日
老子度函谷關關令尹喜善天文登樓四望見東來紫
氣浮關遂知有神人過先勅關吏曰若有老翁東來乘
青牛薄板車勿聽過關其日果見老子來吏入白喜即

帶印綬出迎執弟子禮老子授喜道德經五千卷後喜成仙復與老子相會于蜀

玉門

玉門關在陝西行都司故瓜州西北漢霍去病破走月支開玉關班超在西域上書願生入玉門關即此又撒馬兒國碣石城有鐵門關懸崖絕壁高數十仞徑路崎嶇深二三里夷人守此因號鐵門

金城

金城關在陝西臨洮府蘭縣北五里黃河西北山要隘處宋紹興四年置據河山築城以為固地理志金城郡初築城時得黃金故名金城一云城在京師之西金西方之行故名

白水

范曄後漢書李固為廣漢洛令至白水關乃解印綬歸漢中

藍田

西安府藍田縣東南有藍田關本秦之峽關後周改青泥關隋唐以來改名藍田

虎牢

虎牢關在開封府汜水縣西周穆王獵鄭圃七萃之士高奔戎捕虎生獻之天子命其押養于東虞因名其地曰虎牢漢于此置成臯縣隋復于此置關因名其關曰虎牢唐改為武牢

鴈門

鴈門關在大同府馬邑縣東南東西山巖峭拔中有路盤旋崎嶇絕頂置關南通代州近關有楊六郎寨

終軍棄繻

漢終軍字子雲濟南人初從濟南詣博士步入關關吏與軍繻軍問用此何為吏云傳還當以合符軍曰大丈夫西遊終不復傳還乃棄繻去後軍為謁者使行郡國建節東出關關吏有識之者曰此使者前棄繻生也注云繻帛邊也舊制出入皆以傳傳信也即今之過所文

書後因傳繁乃裂繻頭合以為符信也

郭丹封符

東觀漢記郭丹字少卿南陽人少從師之長安過宛從
宛人陳洮買入關符以入函谷關既入封符乞人曰不
無使者車不復出此關更始二年以丹為諫議大夫持
節安集南陽去家十二年果乘高車出關更始敗歸鄉
里太守杜詩薦為功曹丹薦人自代而去詩嘆息勅以
丹事編署黃堂以為後法

備盜

漢高祖紀楚漢旦日合戰力不敵會項羽季父項伯素善張良良與俱見沛公沛公曰吾入關秋毫無所取籍吏民封府庫待將軍所以閉關者備他盜也豈敢反耶
顧伯明言

通蠻

黎州安撫司城南大渡河外有清溪關唐韋臯鑿之以
通群蠻

王元東封

東觀漢記隗囂將王元說囂天水完富士民最強請以
一九泥為大王東封函谷關此萬世一時也

馬周西入

唐馬周字賓王西入秦關舍新豐逆旅主人不之顧周
命斗酒悠然獨酌

雞頭

雞頭關在漢中府褒城縣北關口有大石狀如雞頭自

此入連雲棧

鹿頭

鹿頭關在廣漢郡德陽縣以縣有鹿頭山因以名關

子胥奔吳

吳越春秋伍子胥自楚奔吳至昭關關吏欲執之子胥
給之曰上所以索我者以我有美珠今我已亡之矣將
告子取吞之關吏懼因舍焉按昭關在今含山縣小峴
山

姜維拒魏

劔門關在保寧府劔州北境大劔山兩壁峭聳有隘束之路諸葛亮因立劔門關厥後姜維退守劔門以拒魏即此

通靈

通靈關在雅州蘆山縣西北舊名靈關蜀都賦關靈關以為門蓋其關甚險一人守之可以禦百

飛仙

飛仙關在雅州蘆山縣南宋宇文博新路賦惟天下之
至險有嚴道之漏閣焉孤峯上絕于青天湍波下走于
長川斷崖橫壁立之岸飛溜濺千丈之源古之漏閣即
此關也

紫眼

紫眼關在四川榮經縣西北昔有紫眼蕃人留寓于此
烏角

烏角關在四川行都司寧蕃衛城南

山海

山海關在永平府撫寧縣東其北為山其南為海相距
不數里實險要之地明朝魏國公移榆關于此改今
名

井陘

井陘關在太原府平定州東韓信擊趙東下井陘即此
瓦橋

瓦橋關在保定府雄縣為三關之一歐陽脩詩古關衰

柳聚寒雅駐馬城頭日影斜猶去西樓二千里行人到此莫思家

土門

土門關在真定府獲鹿縣西唐初所置

紫荆

紫荆關在易州城西歷代為扼塞之所

黃榆

黃榆嶺關在山西遼州和順縣東太行山頂

馬陵

馬陵關在山西遼州榆社縣西北即龐涓自刎處

駱谷

駱谷關在西安府藍屋縣西南

長平

長平關在長子縣南四十里即秦白起坑趙卒四十萬處

大慶

大慶關在蒲州西門外黃河西岸古名蒲津關即秦孟明濟河焚舟處

潼水關

潼關在西安府華陰縣東歷代皆為要地杜佑通典潼關原名衝關言河自龍門南流衝激華山而東也後因關之西有潼水故名潼關左傳所謂桃林塞即此

庾嶺關

廣東南雄府大庾嶺上有梅關兩岸壁立最高且險宋

章穎詩兩州南北護梅關盡日人行石壁間

臧紇出奔

左襄二十三年季孫攻臧氏臧紇斬鹿門之關以出奔邾

陽虎入叛

陽關在兗州府城北左傳陽虎入于謹陽關以叛即此天津

天津關在順天府良鄉縣北西至大龍門凡十五關口

其差大者曰天津關

天井

天井關在潞州城南太行山頂

鴻山

鴻山關在保定府唐縣西北一名洪城昔項羽于此見
羣鴈曰我當南面射中其一及射不中人知羽終不能
濟

龍泉

龍泉關在真定府曲陽縣西自是而東北凡二十一關
口至金龍口自是而西南凡十五關口至白羊口金陵
儀鳳門外有龍江關

墳墓

此與葬類可通用

檀弓注墓塋域也封土為壠曰墳酉陽雜俎周禮方
相氏毆冢象冢好食亡者肝而畏虎與栢故墓上
樹栢路口置石虎為此

不生荆棘

孔子世家孔子葬魯城北泗上塚塋百畝皆種異樹傳言弟子各持方樹種之至今塋中不生荆棘及刺人草王充論衡孔子當泗水而葬水為之却流墓有古檜衡然如虬龍形相傳為孔子手植也

惟樹楊柳

白虎通天子墳高三仞樹以松諸侯半之樹以栢大夫八尺樹以欒士四尺樹以槐庶人無墳樹以楊柳

馬鬣封

禮檀弓孔子之喪有自燕來觀者舍于子夏子夏曰昔夫子言之曰吾見封之若堂者矣見若坊者矣見若覆夏屋者矣見若斧者矣從若斧者焉馬鬣封之謂也今一日而三斬板而已封尚行夫子之志乎哉此言封有四者之形若斧者上狹如刃較之上三者儉而易就故俗謂之馬鬣封馬鬣鬣之上其肉薄封形似之也

牛眠岡

晉陶侃母將葬未得葬地忽失一牛未知所在過一老

父謂曰前岡見一牛眠處其地若葬位極人臣言訖不見侃尋牛得之因葬其母後侃果為三公

過墓則式

白帖顏淵過墓則式

過墓則哭

東漢鮑永嘗事更始後經更始墓拜哭盡哀而去

反國展墓

子路去魯謂顏淵曰何以贈我曰吾聞之也去國則哭

墓而後行反其國不哭展而後入

館寺訪墓

國史補杜羔性至孝其父為河北尉卒邑人故老已盡不知父墓所在羔往訪之館于佛寺日夜悲泣忽視屋柱煤烟之下有字數行拂而視之乃父遺跡云我子孫若求吾墓當于某村家問之羔哭而往果有老父八十餘指示其處因得歸葬

掛劍

吳季札聘魯過徐徐君見札所佩劍口不言而色欲之
季子以有上國之事未獻而心許之及還徐君已死遂
解劍掛墓栢樹而去從者曰徐君已死尚誰予乎札曰
始吾心已許之豈以死背其心哉

取劍

宋書王玄謨從弟玄象為下邳令好發人塚或告垣內
有一小塚上見一女玄象便命發之見棺上有金蠶銅
人百數一女子年可二十姿質若生卧而言曰我東海

王家女資財願相奉幸勿見害玄象見女臂有玉釧斬臂取之女復死

老請墓地

漢成帝時安昌侯張禹年老請平陵肥牛亭地以治塚王根爭以為此地當平陵寢廟衣冠所出遊之道又徙壞舊亭非其所宜宜更賜禹以他地上不從卒以所請賜之按肥牛亭地在扶風平陵縣西亭驛亭也

貴買墓田

宋郭原平父母墳前有田數十畝不屬原平每農月耕者裸袒原平不欲使人慢其墳墓乃貸家貲貴買此田三農之月輒束帶垂泣躬自開墾

風生

越王句踐都瑯琊欲移允常塚塚中風生飛沙射人不得近遂止

雷吼

侯白旌異記盜發白茅塚棺內大吼如雷野雉悉雊穴

內火起飛焰赫然盜被燒死

作墓夾宮

劉向說苑秦樗里子且死曰葬我必于渭南章臺東後
百年當有天子宮夾我墓及漢興長樂宮在其東未央
宮在其西武庫正直其上按樗里子秦惠王異母弟也
秦人諺曰力則任鄙智則樗里

為墓擇地

漢韓信母死擇高燥地為墓令旁可置萬家

占育王寺

宋丞相史彌遠欲占育王寺作墳衆僧俯首莫敢誰何
有一小僧曰我有一策阻之作偈曰寺前一塊地常有
天子氣丞相要作墳不知主何意因題于通衢史意遂
寢

象祁連山

漢霍去病于祁連山獲首虜甚多及薨上悼之令為塚
象祁連山

羊墓王氣

晉羊祜字叔子有善相墓者言祜祖墓有帝王氣若鑿斷其岡則無後祜遂鑿之相者再至曰猶出折臂三公祜後墜馬折臂位至三公而無子

卞墓忠魂

晉卞壺字望之墓在金陵冶城今朝天宮西義熙間盜發壺墓面如生兩手悉拳爪甲透于手背宋曾極詩握節顏公拳透爪歸元先軫面如生晉陵發掘今無主猶

有忠魂在治城

墓側立廟

漢官儀古不墓祭秦始皇起寢廟于墓側漢因不改四
時上飯唐明皇詔寒食上墓禮經無文近代相承寢以
成俗士庶有不合廟祭者何以用展孝思宜許上墓同
拜掃禮五代會要奉先之禮無寒食野祭之儀近代莊
宗每年寒食出祭謂之破散

墓處立策

唐智興微時為徐州門子有道士居門側智興每旦掃
道必掃道士門智興母死道士善審墓地引智立一竹
策以表其處曰若定此地兩世方伯智興他日再往視
竹策叢生遂葬焉果為方伯

墓在白社

豫章記徐穉字孺子墓在郡南白社吳太守徐熙于墓
隧種松太守謝景于墓側立碑晉太守夏侯嵩于碑旁
立思賢亭至拓跋魏時謂之聘君亭

墓立白碑

晉謝安墓在金陵城南之梅岡墓前惟立白碑無文當時謂其功德難述也

墓中續詩

集異記鄭郊河北人舉進士第遊陳蔡間路逢一塚有竹二竿青翠可愛鄭為詩塚上兩竿竹風吹常裊裊久不能續忽聞塚中人曰何不云下有百年人長眠不知曉郊驚不復更言矣

墓側作傳

賈黃中譚錄白傳葬龍門山河南尹盧貞刻醉吟先生
傳立于墓側今洛陽士庶及四方遊人過其墓者必奠
卮酒塚前方丈地常成泥滓

自為壽藏

東漢趙岐字邠卿先自為壽藏圖季札子產晏嬰叔向
四像居賓位自畫其像居主位皆為贊頌宋范至能詩
家庭遺訓煮蒿在不學邠卿畫古圖唐姚崇孫勗自為

壽藏于萬安山麓祖塋之傍兆曰寂居穴墳曰復真堂
中剏土為臺曰化臺司空圖預為塚擲遇勝日引客坐
壙中賦詩酌酒或難之圖曰君何不廣耶生死一致吾
寧暫遊此中哉

不為封域

晉桓溫字子元卒葬姑孰山土墳不為封域唐司勳李
建勳且死戒家人曰時事如此吾得良死幸矣勿封土
立碑聽人耕種其上免為他日發掘之標及亂諸貴人

塚皆被發惟建勲墓不知其處

禁近柳隴

戰國策昔秦王攻齊令曰有敢近柳下季隴五十步樵採者罪死不赦

來尋董墳

漢膠西王相董仲舒墳在長安武帝幸芙蓉園常至此下馬名下馬陵蘇東坡詩下馬來尋董相墳

馬鳴

博物志漢夏侯嬰封滕公一日駕出東都門外馬悲鳴
踏地不進命左右掘馬蹄下得一石櫛有科斗書云佳
城鬱鬱三千年見白石吁嗟滕公居此室公嘆曰天乎
吾死其安此乎後遂葬其地謂之馬塚

烏泣

東漢楊震將葬先十餘日有大烏高丈餘集喪前悲鳴
淚下翼畢飛去遂立烏象于墓前

兔繞房

東漢蔡邕母卒廬于墓側有兔循繞其房室木生連理

燕啣土

漢景帝廢太子臨江王墓在藍田縣葬時有數萬燕啣土置其塚上

鶴弔

晉陶侃丁母憂在墓下忽有二客來弔儀服鮮異禮畢遣人尋之見雙鶴冲天而去

燕尋

劉宋末有女姚玉京室有雙燕一為鷲鳥所獲其一孤
飛不離庭戶凡六七年玉京死燕來周迴尋覓姚氏族泣
語墳在南郭燕至墳所亦死

得銅斗

東漢甄邯墓在金陵玄武湖之側劉宋張永開湖遇古
塚得銅斗一有柄衆皆不識文帝詢之著作郎何承天
曰此新莽威斗三公亡者皆賜之一在塚外一在塚內
斗為天之喉舌故取象焉三公居江左者惟甄邯為大

司徒此必是其墓也啟塚又得一斗有石銘云大司徒
甄邯之墓按綱目新莽天鳳三年秋鑄威斗以石銅為
之若北斗欲厭勝衆兵司命負之出則在前入則在旁
李奇注以五色藥石及銅為之長二尺五寸

獲銅牌

江南野史沈彬年將八十居阜上有一大樹可數拱嘗
示家人曰吾死可葬此既葬穴其處乃古塚見其間儼
然一古燈臺上有漆一盞壙頭獲一銅牌上有鐫篆曰

佳城今已開雖開不葬埋漆燈猶未熱留待沈彬來又
雜俎近有盜發蜀先主墓見兩人張燈對棋盜驚懼拜
謝一人顧曰爾飲乎各飲以一盃與玉帶數條命速出
盜至外口已漆矣帶乃巨蛇也視其穴如舊

五家世守

漢高祖微時數聞魏公子信陵君無忌賢及即位每過
大梁常祀公子及擊黥布還為公子置五家世守其塚
歲以四時奉祀之

五戶灑掃

唐太宗貞觀十九年詔謚殷太師比干曰忠烈命有司封其墓春秋祀以少牢給五戶灑掃

安城表孝

安城縣有孝子孝聞天下太守王君樹雙土闕以表孝墓

亭灣示羞

漢朱買臣字翁子其妻耻夫貧窘遂自嫁于青杉吏人

及買臣為會稽太守舟過青杉閘下其妻審知其為前夫也即脫簪珥拜伏舟次冀得斷絃再續買臣數其罪辟易莫敢對良久遂自投于河溺死買臣即以其尸葬于亭灣名曰羞墓

玄塚

楊雄死弟子負土成墳名曰玄塚

青塚

王昭君墓在古豐州西六十里地多白草此塚獨青故

名青塚

漳河疑塚

輒耕錄曹操疑塚七十二在漳河上宋俞應符題詩生前欺天絕漢統死後欺人設疑塚人生用智死即休何有餘機到丘壟人言疑塚我不疑我有一法君未知直須發盡疑塚七十二必有一塚藏君屍京鎗詩疑塚多留七十餘謀身自謂永無虞不知五馬同槽夢曾為兜孫遠慮無

建康穢塚

秦檜墓在建康墓上豐碑屹立不鏹一字蓋當時士夫鄙其為人兼畏物議故不敢立神道碑及孟珙滅金回屯軍于檜墓所令軍士糞溺墳上人謂之穢塚

作窖得銘

續博物志東都殖業坊十字街有王戎墓隋時釀酒家穿其傍作窖得銘曰晉司徒尚書令安豐侯王君墓

觀崖得銘

唐左衛將軍王果謫雅州刺史于江中泊船仰見巖腹中有一棺臨空半出乃緣崖觀之得銘云欲墮不墮逢王果五百年後重收我果嘆曰吾謫雅州固命也遂收窆而去

求禁樵採

唐武后幸陽至閬鄉縣車騎不進召巫問之曰晉龍驤將軍王濬之墓在道南每為樵採所苦聞大駕至特哀求禁止后詔墓百步外不得樵採杜甫送李尚書櫬云

坐侍龍驤詔蓋用此也

為立門牆

宋朱文公守南康訪屯田劉公凝之之墓為立門牆以
限樵採

文子樂丘

檀弓公叔文子升于瑕丘蘧伯玉從文子曰樂哉斯丘
也死則我欲葬焉

脩期永宅

傳永字脩期嘗登北邙山于平垠處奮矛躍馬回旋瞻
望欲附葬于祖墓遂買左右地數畝勅子叔偉曰此吾
之永宅也

山堂肆考卷三十

欽定四庫全書

山堂肆考卷三十一

明 彭大翼 撰

地理

碑

碑者悲也本虛墓間用之以下棺者古人斲木為碑
又鑿碑令有圓孔樹于槨之四隅于圓孔中著輓轡
兩頭各入碑木以紼之一頭繫棺以一頭繞輓轡既
訖而人各背碑負紼聽鼓聲以漸却行而下之此乃

古者懸窆之禮後人因而書之以表功德因留而不
忍去故碑之名由此而得秦漢以降生而有功德政
事者亦碑之而又易之以石失其旨矣又天子下棺
六綽四碑諸侯四綽二碑士二綽無碑釋名云從前
引之曰紼紼發也發車使前也懸下壙曰綽綽將也
徐徐將下之也

孔子廟碑

唐處州刺史鄴侯李繁至官既新孔子廟又令工改為

顏子至子夏十人像其餘六十子及大儒公羊高等數十人皆圖之壁韓愈為作碑文

季札墓碑

季子墓在江陰縣申浦南距武進縣七十里昔孔子題其碑曰嗚呼有吳延陵季子之墓歲久湮沒宋守朱顏復取孔子所書十字刻碑表識

曹娥碑

漢上虞長度尚弟子邯鄲淳于字子禮弱冠有異才尚

使作曹娥碑操筆而成無所點定蔡邕題八字于碑背
曰黃絹色絲外孫壘白楊脩字德祖為丞相曹操主簿
至江南讀曹娥碑見碑背有八字操不解其意問脩曰
卿知否脩曰知之操曰且勿言待朕思之行三十里乃
得之令脩解脩曰黃絹色絲為絕字幼婦少女為妙字
外孫子女為好字壘白受辛為辭字操曰一如朕意俗
云有智無智行三十里

陶母碑

晉陶侃母湛氏碑也見唐持正先生皇甫湜文集

孔德讓碑

東漢孔君碑及孔德讓碑皆在孔林中孔君孔子十九代孫名震官至河東太守德讓孔子二十世孫都尉君宙之子名謙德讓其字也歷郡諸曹吏宙震之弟

郭有道碑

東漢蔡邕嘗為郭林宗碑文謂盧植曰吾為碑銘多矣求其無愧色者惟郭有道碑耳

班超紀功

唐姜行本高昌之役為行軍總管出伊川距柳谷百里其處有漢班超紀功碑行本乃磨去古刻更刊己頌陳國威靈

盧真記惡

唐盧真累任大郡治有異績人畏之如神明凡治奸惡既斷其罪又以所犯刻石立門再犯必致之死時謂紀惡碑

墮淚碑

晉書羊祜守襄陽有惠政後百姓於祜平生遊憩處建碑立廟故望其碑者莫不流涕因名為墮淚碑

流汗碑

蔡州旣平唐憲宗命道士姓張者至境醮於紫極宮宮本吳少誠生祠有少誠德政碑在焉晉公廢以為宮雷大震碑流汗成泥滓人號流汗碑

武侯誓蠻

衡州耒陽縣東有石碑三國時諸葛亮斬雍闓擒孟獲
回軍經此立石紀功又相傳武侯立石誓蠻曰後有功
在吾上者宜立石於右至宋狄青破儂知高回立碑於
右後為雷所擊惟存斷碑

郭進屏盜

五代周郭進為衡州刺史治有聲望羣盜屏跡世宗勅
杜韓序其事於碑人號屏盜碑

讀道旁碑

東漢王粲字仲宣與人同行讀道旁碑人使粲背誦之
不差一字

立軍中碑

唐吐突承璀欲於軍中為帝立聖政碑磐石請文內相
李絳奏言大人與天地合其德日月合其明無立碑紀
德之事恐貽笑天下憲宗初甚怒絳語不已卒大開悟
除絳中書舍人翌日面賜紫衣金魚又親擇良笏賜之
因勉曰爾當無易此心

蔡邕所作

東漢禰衡與黃祖子射共讀蔡邕所作碑曰吾一覽即能識之惟其二字更不明耳因書之射亦寫碑較之不差人莫不嘆服

索靖所書

隋唐嘉話率更令歐陽詢行見古碑為索靖所書駐馬觀之良久而去數百步復還下馬佇立疲則布毯坐觀因宿其旁三日而去

門人立碑

晉庾袞字叔褒清白不降志及卒宗族鄉閭莫不崇重門人感慕為立碑以表其行

長老拜碑

漢扶風王駿有德政西土為樹碑長老見者無不下拜為臣製碑

唐貞觀七年鄭公魏徵薨上命百官赴喪給羽葆鼓吹陪葬昭陵上登院西樓望哭盡哀自製碑文并為書石

郭知運卒帝詔中書張說紀其功於墓碑張說卒帝親為製碑盧懷慎卒帝經其墓見碑表未立停蹕臨視泣然流涕詔官為立碑令中書侍郎蘇頌為文帝自書之為父立碑

唐張說字道濟嘗自為其父立碑玄宗書其額曰嗚呼積善之墓又黃晉卿自為父碑文有鵲巢其碑

嶧山碑

封氏聞見記嶧山碑有刻此樂石之句人多不曉其義

顏師古曰謂以泗濱浮磬作碑也

省戶碑

唐楊國忠為吏部鮮于仲通等諷選人鄭愆願立碑於
省戶下以誦德詔仲通為頌帝為易數字因以黃金識
其處

大忌生金

晉郭璞字景純謂庾翼曰碑生金庾氏大忌後碑果生
金又永嘉五年賈逵碑生金所謂金不從革羣盜起也

酉陽雜俎
潁陽碑魏曹受禪處後六字生金蓋司馬氏
金行明六世遷魏也

徒作鎮石

隋秦王俊薨王府僚佐請立碑文帝曰欲求名一卷書
足矣何用碑為若子孫不能保家徒為人作鎮石耳

思敬鐫字

見泉

韓愈撰文

汝寧裴晉公廟中有平淮西碑韓愈撰文多歸功於度
不及李愬愬妻唐安公主女也出入禁中因訴碑文不
實憲宗詔斷其文更命段文昌為之元和中還卒推
倒平淮西碑帝怒命縛來朕自斫殺之卒至曰碑中只
言裴度功不言李愬力臣是以不平上命赦罪敕文昌
別撰至宋知州陳昫磨去段文仍刻韓文東坡詩淮西
功業冠於唐吏部文章日月光千古斷碑人膾炙不知
世有段文昌

福先寺碑

唐裴度辟皇甫湜為判官度脩福先寺將立碑欲求文
於白居易湜怒曰近捨湜而遠徵居易信獲戾於門下
矣請從此辭裴謝之湜即請斗酒飲酣揮毫立就裴竒
之因以車馬器物約千緡酬之湜怒曰何待予之薄也
其碑三十字每字二緡更減不得裴笑依數酬之湜亦
受之無愧色

表忠觀碑

觀在杭州龍山宋郡守趙抃以五代錢武肅王墳廟蕪
廢請於朝即龍山廢刹為觀賜額表忠東坡為碑銘

碧落碑

山西絳州興龍宮有碧落石像背刻篆文千餘言世傳
以為碧落碑也白氏六帖因其文有碧落二字故云其
篆文在李璿之以為陳惟玉書李漢以為黃公譔書元
吳子行考古編以為李陽冰蓋唐人能篆者無出陽冰
右故耳一統志又云唐孝子李譔書李陽冰見之嘆其

高古

黃陵碑

黃陵廟在岳州府瀟湘之尾洞庭之口前代立之祠舜
二妃者韓愈為碑文

中興頌碑

大唐中興頌元結撰顏真卿書字奇偉而文古雅世多
磨以黃絹為圖障碑在永州磨崖石而刻之

陰符經碑

陰符經碑在山西汾州平遙縣太平觀內趙秉文草書

羅池廟碑

柳州府城東有羅池廟祀唐刺史柳宗元韓愈為碑文

韓山寺碑

玉泉子云庾信自南朝至北方惟愛溫子昇所作韓山
寺碑或問信曰北方碑文何如曰惟韓山一片石堪與
語餘若驢鳴犬吠耳按子昇字鵬舉博覽百家文章清
婉

韋丹遺愛碑

唐宣宗大中三年上與宰相論元和循吏孰為第一周
墀曰臣嘗守土江西聞觀察使韋丹功德被於八州沒
四十年老稚歌思如丹尚存上乃詔史館修撰杜牧撰
丹遺愛碑仍擢其子宙為御史

高公輔政碑

五代鄭賈嗣纂南詔位改號大長平立撫運碑於大理
府五花樓前後高氏改刻為高公輔政碑

安陸王碑

齊書安陸昭王緬字景業南蘭陵人永明九年五月三十日卒沈休文為作碑

普照王碑

宋初王祐為中書舍人受詔撰普照王碑經宿上進中外驚其神速

四絕碑

唐元魯山墓有碑唐建中立李華作文顏真卿書丹李

陽冰篆額時號四絕

三絕碑

東昌府學有三絕碑金大定間重修文廟王去非撰記
党懷英篆額王廷筠書丹時號三絕

不忍鐫碑

宋崇寧初蔡京為元祐黨籍欲刻石於文殿及天下州
廳召長安匠李安民安民曰司馬相公天下稱其正直
今謂之邪奸安民不忍鐫府官欲罪之匠曰被役不敢

辭乞不刻安民於碑恐後世併以為罪也碑既立一夕雷擊碎

妄令掘碑

後周熊安生學為儒宗在山東時或誑之曰生村古塚是晉河南將軍熊光去熊安生七十二世舊有碑為村人埋匿安生遂令人掘地求之不得連年訟焉冀州刺史鄭謹判曰七十二世乃是義皇上人河南將軍晉無此號安生猶率族人向墓而哭

戴叔倫碑

唐戴叔倫字幼公潤州人貞元進士為撫州刺史遷邕管經畧使墓在金壇縣南三洞鄉梁肅為作神道碑

張敬因碑

歐陽脩集古錄許州長社縣民田中有一碑是唐顏真卿撰并書慶歷中有模之者民家患踐田稼擊碎之予在滁陽遣人求之得一大碑闕一段其文不可次第獨其名氏在焉曰君姓張諱敬因南陽人乃祖乃父曰證

曰運其字畫尤奇

文潞公家廟碑

司馬君實曰先王之制自天子至於官師皆有廟及秦
非笑聖人蕩滅典禮於是天子之外無敢營宗廟者慶
歷元年因郊祀赦聽文武官依舊式立家廟於是翰林
承旨而下共奏請自平章事以上立四廟東宮太保以
上立三廟詔如其請公卿無倡衆為之者獨潞公首奏
乞立廟河南詔可之

富鄭公神道碑

朱子語錄東坡作溫公神道碑叙事甚略其作富公碑甚詳蓋富公在朝不喜東坡其子弟求為此文恐未必得而東坡銳然許之蓋欲得此題目以發己意耳

引水碑

唐光啟中涪陵刺史張濬郡故少井泉乃窮山泉之源以竹導其流民賴其利因作引水碑

戒石碑

宋景煥有野人閒語一書乾德三年立郡國戒石碑四尺上有爾俸爾祿民脂民膏下民易虐上天難欺十六字即其書中語也

狄梁公碑

宋黃庭堅作梁公碑天地閉孰將闢焉日月蝕孰將廓焉大廈仆孰將起焉神器墜孰將舉焉巖巖乎克當其任者惟梁公之偉歟

王仲舒碑

韓退之碑文仲舒字宏中少奉母夫人家江南讀書著
文其譽藹鬱當時名公皆折官位輩行願為內交貞元
初射策拜左拾遺與陽城合論裴延齡不得為相德宗
初怏怏久而嘉之其後入閣德宗顧班列謂宰相曰第
幾人必王某也果然月餘特改右補闕遷禮部考功吏
部三員外郎

樹王駿碑

扶風王駿西土為樹碑長老見碑無不下拜至遺愛如

此

立王晏碑

五代周節度使王晏徐州滕縣人少嘗為羣盜及為節度使悉召故黨贈之金帛謂曰吾鄉素名多盜吾與諸君皆嘗為之想後來者無能居諸君之右諸君幸為我語之使勿復為為者吾必族之於是一境清肅徐人奏請為晏立碑上許之

山堂肆考卷三十一

欽定四庫全書

山堂肆考卷三十二

明彭大翼撰

地理

帝都

帝王世紀伏羲都陳今陳州神農亦都陳又營曲阜
今兗州曲阜縣黃帝都涿鹿今幽州一云都有熊少
昊都窮桑在魯北頗頊都高陽在周為衛地今濮陽
縣帝嚳都亳一曰都高辛堯都平陽今晉州舜都蒲

阪今蒲州禹都安邑在蒲州湯都亳即穀熟號南亳
至仲丁遷囂或曰敖即河南之敖倉河亶甲居相今
相州祖乙居耿在河東皮氏之耿鄉號景亳及盤庚
五遷復南都亳之殷地即偃師號西亳周文王都豐
鎬今京兆界是為西都周公相成王以豐鎬偏處西
方土貢不均乃東營洛邑今東都也成王即洛邑建
明堂朝諸侯復還豐鎬至幽王為犬戎所殺平王始
東遷而居洛邑是為東周矣及敬王又遷成周今洛

陽故都城也終赧王之世不遷秦非子始封于秦即
今隴西也非子之後至孝公始徙咸陽故秦遂都咸
陽漢興都長安光武中興都洛陽又于南陽置南都
三國魏以長安譙許昌鄴洛陽為五都吳都鄂今武
昌後遷建業即今應天府蜀都成都即今成都府晉
都洛陽是為西晉元帝東渡都建業因避愍帝諱改
名建康是為東晉六朝宋齊梁陳並居焉梁元帝及
後梁蕭詧又別居江陵元魏初居雲中即今大同府

懷仁縣後遷洛陽是為東魏後又遷于鄴西魏都長
安北齊亦都鄴即今彰德府周都長安隋初亦都馬
至煬帝始遷洛陽唐復都長安五代梁都汴即今開
封府唐晉都洛陽漢周至趙宋又都汴一云梁唐晉
漢周至趙宋皆都汴南宋都臨安即今杭州元都大
都即今順天府時至上都乃宣府之外地我朝都建
康永樂遷都燕京即今北京也按六朝魏初姓拓跋
氏至孝文帝太和二十年始改姓元氏謂之元魏魏

永熙二年高歡舉兵東向逼其主修奔長安乃立清
河世子善見于洛陽是為東魏後宇文泰復弑其主
修立南陽王寶炬都長安是為西魏宋齊公蕭道成
廢主自立是為南齊都建康東魏高洋廢主自立是
為北齊都鄴古來天子之居曰京曰都者何也蓋天
下以洛陽為中土唐都雍即長安則洛陽在關東故
以為東都宋都汴則洛陽在西故以為西都南京應
天府建在宋真宗時以其在汴之南故曰南京北京

大名府建在宋仁宗時以其在汴之北故曰北京今
我朝之稱南北京者又自二都之地一在南一在北
故耳

定鼎

世紀武王伐紂營洛邑而定鼎焉今洛陽西南洛水之
北有鼎中觀是也

測圭

周禮大司空掌建邦土地之圖以土圭之法測土深正

日影以求日中

作豐

詩大雅文王受命有此武功既伐于崇作邑于豐文王
蒸哉

營鎬

史記成王七年使太保召公先之雒相土其三月周公
往營成周雒邑卜居焉注云成周東周也名為成周者
周道始成王所都也

卜澗水

周書周公往營成周更求告卜作洛誥曰我乃卜澗水
東澗水西惟洛食我又卜澗水東亦惟洛食

因邾山

通鑑周紀周公至洛興土營築是為東都城方千七百
二十丈郭方十七里南繫于洛水北因于邾山

四方之極

詩商頌商邑翼翼四方之極

八埏之中

左思魏都賦夫魏土考之西隩八埏之中也測之寒暑霧露所均也

龍蟠虎踞

見山

山峙水環

順天府志關塞諸山雄峙于西南渾河諸水環繞于東南

蠶叢魚鳧

楊雄蜀本紀蜀始王曰蠶叢次曰伯雍又次曰魚鳧李
白蜀道難蠶叢及魚鳧開國何茫然爾來八萬七千歲
不與秦塞通人烟

峭函隴蜀

漢張良曰夫關中左峭函右隴蜀沃野千里南有巴蜀
之饒北有胡宛之利阻三面而守獨以一面東制諸侯
此所謂金城千里天府之國也

天莊

帝京謂之天莊唐詩延瞰極天莊又曰日畿言帝畿千里象日所經廻也

神州

王嬰古今通論崑崙東南方五千里謂之神州中有和羹鄉方三千里五嶽之城帝王之宅聖人所生也

四塞

漢婁敬曰秦地被山帶河四塞以為固卒然有變百萬

之衆可立具也四塞言四面有山關之固也

雙川

東漢傅毅洛都賦尋歷代之規兆仍險塞之自然決崑崙之洪流據伊洛之雙川

帶涇

班固西都賦漢之西都在于雍州實曰長安左據函谷二嶠之阻表以太華洛南之山右界褒斜隴首之險帶以洪河涇渭之川

貫渭

三輔黃圖秦始皇王兼天下都咸陽渭水貫都以象天漢
橫橋南渡以法牽牛

隩區

西都賦華實之毛則九州之上腴焉防禦之阻則天下
之隩區焉是故橫被六合三成帝畿周以龍興漢以虎
視及至大漢受命而都之也仰悟東井之精俯協河圖
之靈奉春建策留侯演成天人合應以發皇明按劉敬

勸帝建都封奉春侯

豐壤

東漢張衡南京賦於顯樂都既麗且康陪都之南居漢之陽割周楚之豐壤跨荆豫而為疆其地勢則武闕關其西桐柘揭其東流滄浪而為隍廓方城以為墉湯谷涌其後濟水盪其胸推淮引湍三方是通

風雨所交

東京賦昔者先王之經邑也掩觀九隩靡地不營土圭

測景不縮不盈總風雨之所交然後以建王城

聲教所出

唐張九齡傳京師衣冠所聚聲教所出

法日月

白虎通京師者千里之邑號也江云法日月之徑千里

據陰陽

五經要義主者受命創始建國立都必居中土所以總風雨之和據陰陽之正均統四方旁制萬國者也

待諸侯

孟子曰天子之地方千里不千里不足以待諸侯

定四海

唐陸贄奏今之關中古邦畿千里之地王業根本于是
在焉秦嘗用之以傾諸侯漢嘗因之以定四海蓋由憑
山河之形勝宅田里之上腴弱則內保一方當天下無
事可以養力俟時強則外制諸夏據域中之大可以蓄
威昭德

赤縣

張衡靈憲崑崙東南有赤縣神州風雨有時寒暑有節
苟非此土南則多暑北則多寒東則多陰故聖人不處
焉

黃圖

唐高宗建東都詔朕聞踐華固德百二稱乎建瓴卜洛
歸仁七百崇乎定鼎是以控膏腴于天府啟黃圖于渭
濱襟沃壤于王城摛綠宇于河渚

商家八遷

以下遷都

書後序自契至成湯八遷湯始居亳從先王居作帝告
釐沃注云自契父嚳都亳湯自商始遷焉又通鑑外紀
湯始居亳至仲丁遷于囂河亶甲遷于相祖乙遷于耿
至盤庚復遷于亳從湯所都也書序乃謂盤庚五遷將
治亳殷民胥怨作盤庚三篇注云盤庚之前已自有五
遷而作序考之不詳謬言耳

周家五遷

周自后稷始封于邠第三代公劉遷居于邠自此又九
代古公亶父遷于岐是為豐水之西自此又三代武王
得天下遷都于鄩是為豐水之東自此第十一代幽王
為犬戎所殺而子平王遂遷于洛是為東周又自此十
三代至敬王因王猛之亂乃遷于成周是洛陽故都城
也前後凡五遷

劉漢一遷

漢高祖得天下都長安是為西漢至光武中興遷都洛

陽是為東漢凡一遷

曹魏一遷

通鑑魏本都鄴文帝即位徙都洛陽凡一遷

孫吳再遷

通鑑吳始都公安徙都鄂更名鄂曰武昌後遷建業至
晉泰始中吳西陵督步闡表請徙都武昌吳王從之然
揚州之民沂流供給甚苦之且武昌土地危峻墜確非
王者之都故童謠云寧飲建業水不食武昌魚寧還建

業死不止武昌居由是還都建業凡再遷

馬晉一遷

通鑑晉始得天下都洛陽至永嘉初元帝以宣帝曾孫琅玕王覲之子嗣封為安東將軍都督揚州諸軍事鎮建業遂即位凡一遷

元魏一遷

元魏初居雲中後高歡復立善見于洛陽是為東魏凡一遷也

東魏一遷

東魏既定都洛陽議者又謂洛陽西逼西魏南近梁境至十一月復議遷于鄴書下三日即行四十萬戶狼狽就道歡留後部分事畢還晉陽改司州為洛州以元弼為刺史鎮洛陽僕射司馬子如高隆之侍中高岳孫騰留鄴共知朝政出粟一百三十萬石以賑遷民東魏主至鄴改相州刺史為司州牧魏郡太守為魏尹

隋朝一遷

隋文帝始都長安後嫌長安制度狹小又宮內多妖與
納言蘇威高顗等共議乃詔創造新都于龍首山至煬
帝嗣位章仇大翼言于帝曰陛下木命雍州為破木之
衝不可久居又識云修治洛陽還晉家帝深以為然十
一月幸洛陽遂定都焉留晉王昭守長安凡一遷至唐
復都長安

宋朝一遷

趙宋都汴至高宗為金人所逼從呂頤浩等議遂升杭

州為臨安府至紹興八年始定都焉

帝符

春秋孔演圖天子皆五土之精寶各以次運相據其起也必有神靈符紀使之開階立運

景星耀天

帝王世紀堯佐帝摯受封于唐年二十而登帝位以火承木景星耀于天甘露降于地朱草生于郊鳳凰止于庭

榮光出河

尚書中候帝堯卽政榮光出河

得玉厯

搜神記舜耕于歷山得玉厯于河際之巖舜知天命在已體道不倦

賜寶文

河圖禹治水功大天帝以寶文大字賜禹佩之以渡北海
海弱水之灘

錫壽

周書禹乃嗣興天錫禹洪範九疇彝倫攸叙

陞書

圖錄西狩得麟之後天陞血書于魯端門明日血書飛
為赤烏言漢代周也又學林夫子見薪采者獲麟乃按
圖錄知劉季當代周蓋麟者木精薪采者庶人燃火之
意孔子絕筆于春不書下三時者明木絕火旺周當授
于漢也

五星入房

文選武王滅紂時五星入房房蒼龍之精以周室木德故五星表木瑞

五星聚井

漢王元年五星聚東井此高祖受命之符也

投劍

拾遺記漢太上皇微時遊山澤間有冶鑄曰若得腰間佩刀雜冶中即成神器可以克天下昂星精為輔可以

殲三殍太上皇曰此物名七首遂解投烟焰中及劍成授上皇上皇以賜高祖乃殲三殍宅天下鈞命決云蕭何昴星精項羽陳勝胡廣為三殍

奉符

漢儒生彊華自關中奉赤伏符來詣蕭王曰劉秀發兵捕不道四夷雲集龍闕于野四七之際火為主羣臣因請奉蕭王即位于鄴南是為光武注云識記之書曰符赤伏符名漢德尚火赤火色伏藏也四夷雲集龍闕于

野羣雄角力也四七二十八也自高祖至光武初起合二百二十八年即四七之際也一說光武以二十八歲起兵故云

大蛇當徑

漢高祖沛人初為泗上亭長為縣送徒驪山徒多道亡到豐西止飲夜乃解縱所送徒謂曰公等皆去吾亦從此遁矣季被酒夜徑澤中有大蛇當徑季拔劍斬之有老嫗哭曰吾子白帝子也今為赤帝子所殺忽不見

季七匿芒碭山中

神魚舞河

見河

白水真人

東漢光武起自南陽而有天下以貨泉之文為白水真人蓋帝舊與吳漢同居白水鄉故也

金陵天子

晉元帝紀秦時望氣者云金陵有天子氣五百年後當

有真人出故始皇東遊以厭之且塹北山以絕其勢及孫權稱號自為當之孫盛以為始皇建于孫權四百三十七載考其歷數猶為未及至晉元帝渡江已五百二十六年真人之應在于此矣

夢龍據胸

漢高祖虜魏王豹薄姬輸織室詔納之後宮歲餘召幸之姬對曰昨夢龍據妾胸上曰是貴徵也吾為汝成之遂幸生文帝

見蛇入鼻

邵氏聞見錄宋藝祖微時入洛至長壽寺大佛殿枕柱礎晝寢有藏經院僧見赤蛇入帝鼻帝寤僧問所向帝曰欲見柴太尉于澶州無資僧曰某有一驢子可乘又以錢幣為獻帝遂行柴太尉一見竒之留幕府未幾柴即天子位是為周世宗帝與宣祖俱事之後遂受禪于周

黃旗紫蓋

吳志陳紀曰黃旗紫蓋運在東南

玉馬金牛

孫氏瑞應圖玉馬金牛者瑞器也王者清明篤賢則玉馬至土地開闢則金牛至

探策

世說晉武始踐祚探策得一王者世數繫此多少帝既不悅羣臣失色莫能有言侍中裴楷進曰臣聞天得一以清地得一以寧侯王得一以為天下貞帝悅羣臣嘆

服

祝石

見石

慶雲見

唐代宗即位慶雲見黃氣抱日

歲星明

宋劉原父嘗齋太乙宮與王堯臣夜語曰歲星往來虛危間其色甚明以吾觀之當有興于齊者歲餘英宗以

齊州防禦使入繼大統

玄川靈龜

魏氏春秋明帝青龍三年張掖郡邢丹縣金山玄川溢湧石馬負圖狀象靈龜立于川

江寧玉麟

晉元帝永嘉初有玉冊見于長安白玉麒麟神璽出于江寧其文曰長壽萬年

登極

易乾卦九五飛龍在天大人造也離卦大人以繼明
照四方繫辭聖人之大寶曰位何以守位曰仁

陟位

虞書帝曰格汝舜詢事考言乃言底可績三載汝陟帝
位舜讓于德弗嗣

總師

虞書帝曰格汝禹朕宅帝位三十有三載耄期倦于勤
汝惟不怠總朕師

終陟元后

虞書帝曰來禹予懋乃德嘉乃丕績天之厯數在爾躬
汝終陟元后

俾作神主

商書伊尹曰夏王弗克庸德慢神虐民皇天弗保監于
萬方啟迪有命眷求一德俾作神主

亶聰明

周書亶聰明作元后元后作民父母

錫勇智

商書天乃錫王勇智表正萬邦續禹舊服

正位凝命

易鼎卦木上有火君子以正位凝命

順天應人

易革卦天地革而四時成湯武革命順乎天而應乎人
革之時義大矣哉

一民心

千寶晉武帝革命論古之有天下者拓皇粟陸以前為而不有應而不求執大象也鴻荒世及一民心也堯舜內禪體文德也漢魏外禪順大名也湯武革命應天人也高光爭伐定功業也各因其運而得天下隨時之義大矣哉

承天曆

塗山銘夏后氏勤勞萬邦和寧四極順承天曆自南河而受四海大位定焉萬國既固宣省風教自塗山而會

諸侯大政立馬位莫隆于執大衆乃輯五瑞以建皇極
政莫先于齊大統乃朝玉帛以混經制所以承唐虞之
後垂子孫之丕基立商周之前建帝王之洪範也

雲龍風虎

易乾卦雲從龍風從虎聖人作而萬物覩

朝覲謳歌

孟子曰朝覲者不之堯之子而之舜謳歌者不謳歌堯
之子而謳歌舜

應期撫運

晉元帝紀劉琨上書陛下應受命之期撫千載之運

握紀御符

唐李百藥封建論陛下握紀御符應期啟聖

系統接緒

班固東都賦系唐統接漢緒茂育羣生恢復疆宇

睠命膺圖

宋建隆元年太祖即位制五運推移上帝于焉睠命三

靈改卜王者所以膺圖

接千歲統

太史公自序今天子接千歲之統封泰山而余不得同行是命也

法五始要

漢王褒聖主得賢臣頌恭惟春秋法五始之要在乎審
已正統而已注云五始一元二春三王四正月五公即位

地闢天開

宋張于湖賀英宗登極表星輝海潤方肇啟于青宮地
闢天開遂丕膺于赤紀有赫聖人之大業於昭天下之
至公

言傳號渙

宋曾鞏曰人主之尊意諭色授而六服震動言傳號渙
而萬里奔走

天時人事

東漢鄧禹說大司馬劉秀曰歷觀徃古聖人之興天時
人事二科而已今以天時觀之更始既立而災變方興
以人事觀之帝王大業非凡夫所任明公素有盛德大
功天下向服為今之計莫如延攬英雄務悅民心立高
祖之業救萬民之命以公而慮天下不足定也

天意人謀

宋靖康二年三月甲戌元祐太后降手詔迎康王曰漢
家之厄十世宜光武之中興獻公之子九人惟重耳之

尚在茲為天意夫豈人謀

嗣器

宋太宗即位制王者繼統承祧所以嗣神器也今猥以
神器付于冲人遵治命而莫或固辭涉大川而罔知攸
濟

傳歸

宋英宗即位制蒸民之生置君為之司牧神器之重有
子所以傳歸

改元

古今源流堯舜有天下書載其即位之始而曰月正
元日夫子序書于成湯之後曰太甲元年而當時伊
尹亦有元祀之稱則元之名昉于此矣

資始

易大哉乾元萬物資始

履端

左文元年先王之正時也履端于始舉正於中歸餘于

終履端于始序則無愆舉正于中民則不惑歸餘於終
事則不悖

彌後元年

漢文帝時趙人新垣平言闕下有寶玉氣而使人持玉
杯獻之刻曰人主延壽又言候日再中居頃之日卻復
中于是始更十七年為元年謂之後元年

稱中元年

漢景帝即位改元巳七年矣至八年壬辰又改曰中元

年已六年矣至七年戊戌又改曰後元年

因事而改

漢武帝即位已更為建元之名自是而後纔值六年因大星而改元光又六年無事而改元朔又六年獲白鵠而改元鼎又六年封泰山而改元封

問歲而改

漢至昭宣而後凡所謂神爵甘露黃龍之名或一年而改或間歲而改又不拘六年之說矣其後有僅改一二

如後漢光武即位之初改元建武至三十一年而後改中元是也又有終其身而不改如唐太宗之貞觀三十三年是也此非所謂賢明之君見高一世者哉

自稱年號

漢唐而降各有隨其鼎峙之勢而自稱年號者如三國之魏與吳蜀是也

各據年號

三國而後有隨其分裂之勢而各據年號者如南北朝

之晉宋齊梁陳與後魏北齊後周是也是以彼此各有元年惟主正統者則以正統之元年為準

爰舉舊章

宋太宗開寶九年改太平興國元年制自登宸極再易朔辰改元更號爰舉前代之舊章蕩穢滌邪用洽普天之大慶

式遵古義

宋真宗至道四年改元咸平元年詔承上穹之眷命宅

大寶以踰年四序履端萬物資始式遵古義俾易新元

取象陽春

宋太宗端拱三年改淳化元年制朕受天明命司牧黎
元寰宇幸致于和平稼穡屢登于豐稔慶茲玄感恩舉
舊章因斯獻歲取象陽春宜改紀元之號仍覃生物之
恩

式新端厯

宋仁宗寶元改為康定詔導迎至和消伏衆變推榮正

本協紀求中庶回靈鑒之孚式新端歷之授

改淳化為至道

宋太宗改元德音當惟新于大政冀永保于鴻猷發號
改元與民更始

改嘉祐為治平

宋英宗改元制自親庶政甫涉踰年中外又寧風雨時
若惟春秋之正始蓋歷代之通規獻歲發春方臨吉旦
紀年更號祇率舊章

冀自天之祐

仁宗慶厯九年改為皇祐制春夏之交霖雨作沴傷暴
禾麥漂溢隄防粒食罄闕廬舍蕩空流離鄉邦十室而
九當原究其由來祈弭消于災變仍更紀歲之名用冀
自天之佑

昭受命之符

宋哲宗改紹聖五年六月朔為元符詔統承聖緒紹述
先猷克享天心屢蒙嘉貺甘露薦降靈光燭天思答神

休以協瑞應其易統年之號用詔受命之符

皇祐改為至和

仁宗因日食正陽改皇祐六年為至和德音皇天降譴
太史上言豫陳薄蝕之災近在正陽之朔永思厥咎在
予一人是用改避正寢却去常珍俾更元厯之名冀召
太和之福

崇寧改為大觀

徽宗改崇寧為大觀制兵革不試圉圉屢空邊陲晏安

年穀豐稔乾高垂象日當交而不虧坤厚薦珍禾與芝而並秀是用因三朝之慶會順一氣之發生易冠元之名覃作解之澤既革而當惟新是圖

作新斯民

哲宗改元豐九年為元祐御札永惟春秋正始之義深見天人相與之符即位逾年改元布政以昭宣令典以作新斯民顧惟守成敢忘繼序

肇新元統

徽宗改建中靖國御札思建皇極嘉靖庶邦端好惡以示人本中和而垂政稽歷數在躬之文念春秋謹始之義肇新元統國有典常宜遵踰歲之期以易紀年之號

聖誕

古今源流至論自唐明皇以八月五日生始以是日為千秋節故張衍上大衍歷序有開元十六年八月端午赤光照室之文宋璟千秋節表有月惟仲秋日在端午之句則聖誕之名蓋昉于此

大電繞樞

帝王世紀黃帝少昊之子姬姓也母附寶見大電光繞北斗樞星感之而孕二十四月生黃帝于壽邱

大星流渚

世紀少昊名摯字青陽姬姓也母女節黃帝時有大星如虹流于華渚女節感之而生少昊為金天氏

感于尚羊

世紀神農姜姓也母曰妊姁名女登為有喬氏之女遊

于華陽有神龍首感女登于尚羊而生炎帝人身牛首
長于姜水以火承木位在南方主夏故謂之炎帝

感于幽房

世紀顓頊黃帝之孫昌意之子姬姓也母景僕為昌意
正妃謂之女姬金天氏之末瑤光之星感女姬于幽房
之宮生顓頊于若水首戴干戈

生丹陵

世紀堯伊祁姓也母曰慶都孕十四月而生堯于丹陵

名曰放勳又春秋合誠圖堯母慶都出觀三河與赤龍合而生堯

生姚墟

世紀舜姚姓也其先出自顓頊顓生窮蟬窮蟬有子曰敬康敬康生勾芒勾芒有子曰橋牛橋牛生瞽瞍瞽瞍妻曰握登見大虹意感而生舜于姚墟字都君家本冀州其母早死瞽瞍更娶生象傲而父頑母嚚咸欲殺舜吞珠孕禹

世紀禹姒姓也其先出顓頊顓頊生鯀堯封鯀為崇伯
納有莘氏脩己脩己山行見流星貫昴又吞神珠意感
而生禹于石紐名文命字高密長于西夷堯命為司空
繼鯀治水有功賜姓姒氏封為夏伯故謂之伯禹

懷卯生契

世紀商之始也有神女簡狄遊于桑野見鳥遺卵于地
有五色文作八百字簡狄拾之貯以玉筭夜夢神母謂
曰爾懷此卵即生聖子狄懷一年而有娠經十四月而

生契祚以八百叶卯之文也

扶都生湯

世紀殷商氏出自帝嚳子姓也主癸之妃曰扶都見白氣貫月意感以乙日生湯故名履字帝乙是為成湯

太任生文

世紀周文王姬姓也名昌父季歷母太任當殷王祖甲二十八祀庚寅生昌昌有聖德又得聖女妣氏以為之配年十五而生太子發是為武王武王娶呂望女邑姜

生子誦是為成王

玉雞銜珠

世紀漢出自帝堯劉姓也豐公生執嘉即太上皇太上
皇之妃曰媼是為昭靈后生子邦是為漢高祖一說高
祖母浴于洛池見玉雞銜赤石珠名玉英吞之有孕而
生高祖

赤羃蔽戶

見七夕

春陵佳氣

東漢光武之父南頓君初為濟陽令生帝於縣舍有赤
光照室影如五麟七鳳是歲縣界嘉禾生一莖九穗因
名帝曰秀望氣者蘇伯阿為王莽使至南陽遙望見春
陵城郭嘆曰佳哉鬱鬱葱葱及帝起兵還春陵望見舍
南火光赫然燭天

武功慶雲

唐太宗生于武功之別館時有慶雲見彌漫數里上屬

于天二龍戲于館門之外水中三日乃去

雲蓋

魏文帝生時有雲氣青色圜如車蓋覆其上

星珠

宋乾德四年三月五星如連珠聚于奎當魯分從鎮星
晨見東方占曰有德有慶大人奄有四方子孫繁昌明
年真宗誕生生母李氏帝即位追尊皇太后謚明德

夢神與交

符堅母荀氏祈子西門豹祠其夜夢神與交有孕生堅
神光自天燭其庭背有赤文隱起成字曰草符臣

夢神決脅

唐肅宗在東宮時張后忽寢厭不寤太子問之夢神以
劍決我脅而入殆不能堪以燭照之其文隱然遂有孕
生代宗

紅光燭天

隋煬帝生時紅光燭天里中牛馬皆驚

異香經宿

宋太宗為宣祖之次子母昭憲皇后夢日入懷而娠後
唐天成二年丁亥二月十六日生於洛陽大內夾馬營
是時赤光繞室異香經宿不散

白氣充庭

後唐太祖在妊十三月生紅光照室白氣充庭井水暴
溢

赤光滿室

宋英宗天聖十年生於宣平坊赤光滿室黃龍往來于室中

后榻靈芝

宋仁宗誕降郭太后榻下生靈芝四十二葉後享國四十二年乃瑞應云按郭太后真宗之后仁宗嫡母景德三年崩祥符五年復立劉氏為后仁宗乃宸妃李氏所生劉后以為己子與楊淑妃同撫育之一說李氏嘗夢一羽衣之士跣足從空而下云來為汝子時真宗未有

嗣聞之大嘉云當為汝成之是夕召幸有娠明年誕育
仁宗仁宗幼年每穿履襪亟令脫去常徒步禁中皆呼
為赤脚仙人赤脚仙乃古得道李君也李氏又嘗夢二
日在天其一忽墜自以衣裾承之自此有娠仁宗即位
追尊李氏為章懿皇后

丞廳赤光

揮麈錄秀州外醫張浩自云少隸軍籍嘗為德清閭官
一日晚過嘉興縣忽覩丞廳赤光照天疑為回祿亟入

視之乃趙縣丞之室適婉娘是宋孝宗誕育時也

千齡啟聖

唐張說奉和千秋節宴應制詩五德生王者千齡啟聖人

三合輦基

宋淳熙中孝宗及皇太子朝上皇于德壽宮置酒賦詩為樂從臣皆和周益公詩一丁扶火德三合輦皇基揚誠齋詩祖堯父舜真千載禹子湯孫自一家又云天意

分明昌火德誕辰三世總丁年蓋高宗生于大觀丁亥
孝宗生于建炎丁未光宗生于紹興丁卯故陰陽家以
亥卯未為三合

天申節

宋吳芾表華渚呈祥預紀有開之慶薰風從律式逢載
夙之辰

天寧節

宋宰臣章惇等表詩紀生民易稱出震時惟陽月瑞集

樞星肇開震夙之祥永御光華之旦離明繼照敷同四海之懽天德出寧請祝萬年之壽請以十月十日爲天寧節

聖壽

韓愈佛骨表黃帝百十歲少昊百歲顓頊九十八歲
帝嚳一百五歲帝堯百十歲帝舜禹湯皆百歲文王
九十七歲武王九十三歲

天保歌

詩小雅天保定爾以莫不興如山如阜如岡如陵如川
之方至以莫不增如月之恒如日之升如南山之壽不
騫不崩如松柏之茂無不爾或承

闕宮頌

詩魯頌俾爾熾而昌俾爾壽而臧保彼東方魯邦是常
不虧不崩不震不騰三壽作朋如岡如陵俾爾昌而熾
俾爾壽而富黃髮台背壽眉與試俾爾昌而大俾爾耆
而艾萬有千歲眉壽無有害天錫公純嘏眉壽保魯居

常與許復周公之宇魯侯燕喜令妻壽母宜大夫士庶
邦國是有既多受祉黃髮兒齒

夢與九齡

禮文王世子文王謂武王曰女何夢矣武王對曰夢帝
與我九齡文王曰女以為何也武王曰西方有九國焉
君王其終撫諸文王曰非也古者謂年為齡齒亦齡也
我百爾九十吾與爾三馬文王九十七乃終武王九十
三而終

聞呼萬歲

見嵩高山

華封三祝

莊子曰堯觀乎華封華封人曰嘻聖人請祝聖人使聖人壽堯曰辭使聖人富堯曰辭使聖人多男子堯曰辭封人曰壽富多男子人之所欲也女獨不欲何也堯曰多男子則多懼富則多事壽則多辱是三者非所以養德也故辭

麥丘三祝

劉向新序齊桓公田至麥丘見麥丘邑人問年幾何對曰八十有三矣公曰美哉壽乎子其以子壽祝寡人邑人曰祝主君甚壽金玉是賤人民是寶公曰至德不孤善言必再吾子復之曰祝主君使無羞學無惡下問賢者在傍諫者得人公曰至德不孤善言必三吾子復之曰祝主君使無得罪于羣臣百姓公作色曰吾聞子得罪于父臣得罪于君未聞君得罪于臣也邑人拜而起

曰子得罪于父可因姑姊妹叔父而解之臣得罪于君可因便嬖左右而謝之昔桀得罪于湯紂得罪于武王此則君之得罪于臣者也莫為謝至今得罪公曰善扶而載之自御以歸禮之于朝封之以麥丘而斷政焉

玉卮上壽

漢高祖時淮南王等朝未央宮置酒前殿上奉玉卮為太上皇壽曰始大人常以臣亡賴不能治產業不如仲力今某之業所就孰與仲多殿上羣臣皆稱萬歲大笑

為樂

玉杯獻壽

漢文帝時趙人新垣平使人詣闕獻玉杯刻曰人主延壽

明堂上壽

漢武帝東封泰山還登明堂倪寬奉觴再拜上千萬歲壽

凌烟為壽

唐太宗貞觀四年突厥頡利可汗朝長安上御順天樓
盛陳文物引見上皇聞擒頡利嘆曰吾付託得人復何
憂哉置酒凌烟閣太宗起舞公卿迭起為壽

遠懷上壽

漢昭帝時公卿百官以帝威德懷遠祥物類應乃集朝
堂

寇平上壽

唐憲宗時吳元濟初平宴百僚裴度舉觴曰陛下神武

獨斷寇逆削平願與九州四海上千萬歲壽

生日罷宴樂

唐太宗貞觀二十年十二月謂長孫無忌等曰今日吾生日世俗皆為樂在朕翻成傷感詩云哀哀父母生我劬勞何以劬勞之日更為宴樂乎

生日却貢獻

唐德宗建中元年夏四月生日四方貢獻皆不受李正己田悅獻縑三萬匹上悉歸之度支以代租賦

號萬歲樂

唐武后造鳥歌萬歲樂蓋鸚鵡與秦吉了鳥俱能言后喜其能諧和以高平調奏之至憲宗時劉弘去鳥歌改入黃鍾正宮調號聖朝萬歲樂

作千秋樂

唐開元十六年八月初五日玄宗以降誕日宴百官于花萼樓下作千秋樂丞相源乾曜等請以是日為千秋節布于天下咸令宴樂羣臣皆獻寶鏡張九齡乃述前

興廢之際為書五卷謂之千秋金鑑錄上之

諸將上壽

唐太宗時七德舞初成觀者皆踴躍諸將上壽稱萬歲
諸道獻壽

唐代宗大歷元年冬十月上生日諸道節度使獻金帛
器服珍玩駿馬為壽共值緡錢二十四萬常袞上言節
度使非能男耕女織必取之于民歛怨求媚不可長也
請却之上不聽

正旦慶壽

宋高祖紹興二十九年正旦以太后八十上詣慈寧宮

行慶壽禮依建隆故事許百官稱賀

立春慶壽

二十年十二月以太上皇來年聖壽七十

預于立春日詣德壽宮行慶壽禮開宴凌虛閣下

山堂肆考卷三十二